



Frá blaðamannafundi í gær þar sem tilkynnt var um skipti á þingsætum.
Fimamynd Árni Bjarna

Kvennalistinn:

Þingkonur skiptast á

Kvennalistinn hefur ákveðið að fram fari skipting á þingmönnum þannig að út fari þær Kristín Halldórsdóttir, alþingismaður, og Guðrún Agnarsdóttir, alþingismaður. Í stað þeirra koma Anna Ólafsdóttir Björnsson, sagnfræðingur og blaðamaður, fyrir Kristínu, en Guðrún Halldórsdóttir fyrir Guðrúnu Agnarsdóttur.

Skiptin fara ekki fram á sama tíma. Anna tekur við af Kristínu í október í haust er Alþingi kemur saman að nýju eftir sumarfrí. Guðrún tekur hins vegar ekki við af Guðrúnu fyrr en eftir áramót, vegna anna hjá hinni fyrrnefndu.

Þetta var ákveðið á vorkundi

sem Kvennalistinn hélt í Skálholti um helgina, en þar var einnig fjallað um mál eins og alvarlegt atvinnuleysi kvenna umfram almennt atvinnuleysi og um vandamál sem verið hafa að grafa um sig í bæjarstjórn Selfoss. Á vorkundinum skýrði Sigríður Jensdóttir, fulltrúi Kv. í bæjarstjórninni, frá því hvað hún taldi hafa leitt til þess að Sjálfstæðismenn kusu að kljúfa sig út úr meirihlutasamstarfi Kv., Alþýðufl. og Alþýðubandalags. Samkvæmt síðustu fréttum mun ekki ólíklegt talið að á næsta fundi bæjarstjórnarinnar, á miðvikudag, verði reynt að ná saman aftur þessu meirihlutasamstarfi. **KB**